

四庫全書

集部

欽定四庫全書

集部

石倉歷代詩選卷四十四下

詳校官庶吉士臣范逢恩

侍讀_臣孫球覆勘

總校官進士_臣朱 鈐

校對官編修_臣潘曾起

謄錄監生_臣蔣 翰

欽定四庫全書

石倉歷代詩選卷四十四下

明 曹學佺 編

盛唐十三下

李白

長相思二首

長相思在長安
絡緯秋啼金井闌
微霜淒淒簾色寒
孤燈不明思欲絕
卷帷望月空長歎
美人如花隔雲端
上有青冥之高天下有淥水之波瀾
天長地遠魂飛苦
夢行不到關山難
長相思摧心肝

欽定四庫全書

石倉歷代詩選
卷四十四下

日色已盡花含煙
月明欲素愁不眠
趙瑟初停鳳凰柱
蜀琴欲奏鴛鴦絃
此曲有意無人傳
願隨春風寄燕然
憶君迢迢隔青天
昔時橫波目今為流淚
泉不信妾腸斷
歸來看取明鏡前

前有一樽酒行

春風東來忽相過
金樽綠酒生微波
落花紛紛稍覺多

美人欲醉朱顏酡青軒桃李能幾何流光欺人忽蹉跎
君起舞日西夕當年意氣不肯平白髮如絲竟何益

夜坐吟

冬夜夜寒覺夜長沈吟久坐坐北堂冰合井泉月入閨
金缸青凝照悲啼金缸滅啼轉多掩妾淚聽君歌歌有
聲妾有情情聲合兩無違一語不入意從君萬曲梁塵
飛

夷則格上白鳩拂舞賦

鏗鳴鐘考朗鼓歌白鳩引拂舞白鳩之白誰與鄰霜衣
雪襟誠可珍含哺七子能均平食不噎性安馴首農
政鳴陽春天子刻玉杖鏤形賜耆人白鷺亦白非純
真外潔其色心匪仁闕五德無司晨胡為啄我葭下
之紫鱗鷹鷂鵲貪而好殺鳳凰雖大聖不願以為
臣

北風行

燭龍棲寒門光曜猶旦開日月照之何不及此惟有北

風號怒天上來燕山雪花大如席片片吹落軒轅臺幽
州思婦十二月停歌罷笑雙蛾摧倚門望行人念君長
城苦寒良可哀別時提劍救邊去遺此虎文金鞞釵中
有一雙白羽箭蜘蛛結網生塵埃箭空在人今戰死不
復迴不思見此物焚之已成灰黃河捧土尚可塞北風
雨雪恨難裁

獨漉篇

獨漉水中泥水濁不見月不見月尚可水深行人沒越

鳥從南來胡雁亦北度我欲彎弓向天射惜其中道失
歸路落葉別樹飄零隨風客無所託悲與此同羅幃舒
卷似有人開明月直入無心可猜雄劍挂壁時時龍鳴
不斷犀象繡澀苔生國耻未雪何由成名神鷹夢澤不
顧鴟鵂為君一擊搏鵬九天

登高丘而望遠海

登高丘望遠海六鰲骨已霜三山流安在扶桑半摧折
白日沈光彩銀臺金闕如夢中秦皇漢武空相待精衛

費木石龜鼉無所憑君不見驪山茂陵盡灰滅牧羊之
子來攀登盜賊劫寶玉精靈竟何能窮兵黷武今如此
鼎湖飛龍安可乘

陽春歌

長安白日照春空綠楊結煙柔
風披香殿前花始紅
流芳發色繡戶中繡戶中相經過
飛燕皇后輕身舞紫
宮夫人絕世歌聖君三萬六千日
歲歲年年奈樂何

楊叛兒

君歌楊叛兒妾勸新豐酒何許最關人烏啼白門柳烏啼隱楊花君醉留妾家博山爐中沈香火雙煙一氣凌紫霞

山人勸酒

蒼蒼雲松落落綺皓春風爾來為阿誰蝴蝶忽然滿芳草秀眉霜雪顏桃花骨青髓綠長美好稱是秦時避世人勸酒相歡不知老各守麋鹿志耻隨龍虎爭歛起佐太子漢皇乃復驚顧謂戚夫人彼翁羽翼成歸來商山

下泛若雲無情舉觴酌巢由洗耳何獨清皓歌望嵩嶽
意氣遙相傾

于闐采花

于闐采花人自言花相似明妃一朝西入胡胡中美女
多羞死乃知漢地多名姝胡中無花可方比丹青能令
醜者妍無鹽翻在深宮裏自古妬蛾眉胡沙埋皓齒

王昭君

漢家秦地月流影送明妃一上玉關道天涯去不歸漢

月還從東海出明妃西嫁無來日燕支長寒雪作花蛾
眉憔悴沒胡沙生之黃金枉圖畫死留青塚使人嗟

白頭吟

錦水東北流波蕩雙鴛鴦雄巢漢宮樹雌弄秦草芳寧
同萬死碎綺翼不分雲間兩分張此時阿嬌正嬌妬獨
坐長門愁日暮但願君恩顧妾深豈惜黃金買詞賦相
如作賦得黃金丈夫好新多異心一朝將聘茂陵女文
君因贈白頭吟東流不作西歸水落花辭條羞故林兔

絲本無情隨風任傾倒誰使女蘿枝而來強縈抱兩草
猶一心人心不如草草捲龍鬚席從他生網絲且留琬
珀枕或有夢來時覆水再收豈滿杯棄妾已去難重回
古來得意不相負祇今惟見青陵臺

臨江王節士歌

洞庭白波木葉稀燕鴻始入吳雲飛吳雲寒燕鴻苦風
號沙宿瀟湘浦節士感秋淚如雨白日當天心照之可
以事明主壯氣憤寒風生安得倚天劍跨海斬長鯨

白紵辭

揚清歌發皓齒北方佳人東隣子且吟白紵停綠水長
袖拂面為君起寒雲夜捲霜海空胡風吹天飄塞鴻玉
顏滿堂樂未終館娃日落歌吹濛

鳴雁行

胡雁鳴辭燕山昨發委羽朝度關一一銜蘆枝南飛散
落天地間連行接翼往復還客居煙波寄湘吳凌霜觸
雪毛體枯畏蓬燉驚相呼聞弦虛墜良可吁君更彈

射何為乎

白鼻騮

銀鞍白鼻騮
綠地障泥錦
細雨春風花
落時揮鞭直
就

胡姬飲

扶風豪士歌

洛陽三月飛胡沙
洛陽城中人怨嗟
天津流水波赤血
白骨相撐如亂麻
我亦東奔向吳國
浮雲四塞道路賒
東方日出啼早鵲
城門人開掃落花
梧桐楊柳拂金井

來醉扶風豪士家扶風豪士天下奇意氣相傾山可移
作人不倚將軍勢飲酒豈顧尚書期雕盤綺食會衆客
吳歌趙舞香風吹原嘗春陵六國時開心寫意君所知
堂中各有三千士明日報恩知是誰撫長劍一揚眉清
水白石何離離脫吾帽向君笑飲君酒為君吟張良未
逐赤松去橋邊黃石知我心

贈從弟南平太守之謫

少年不作意落魄無安居願隨任公子欲釣吞舟魚常

時飲酒逐風景壯心遂與功名疎蘭生谷底人不鋤雲
在高山空卷舒漢家天子馳駟馬赤車蜀道迎相如天
門九重謁聖人龍顏一解四海春彤庭左右呼萬歲拜
賀明主收沈淪翰林秉筆迴英眄麟閣崢嶸誰可見承
恩初入銀臺門著書獨在金鑾殿龍駒雕礚白玉鞍象
牀綺食黃金盤當時笑我微賤者却來請謁為交歡一
朝謝病遊江海疇昔相知幾人在前門長揖後門關今
日結交明日改愛君山嶽心不移隨君雲霧迷所為夢

得池塘生春草使我長價登樓詩別後遙傳臨海作可
見羊何共和之

寄王屋山人孟大融

我昔東海上勞山餐紫霞親見安期公食棗大如瓜中
年謁漢主不愜還歸家朱顏謝春暉白髮見生涯所期
就金液飛步登雲車願隨夫子天壇上閒與仙人掃落
花

寄韋南陵冰余江上乘興訪之遇尋顏尚書笑

有此贈

南船正東風北船來自緩江上相逢借問君語笑未了
風吹斷聞君攜妓訪情人應為尚書不顧身堂上三十
珠履客甕中百斛金陵春恨我阻此樂淹留楚江濱月
色醉遠客山花開欲然春風狂殺人一日劇三年乘興
嫌太遲焚却子猷船夢見五柳枝已堪挂馬鞭何日到
彭澤長歌陶令前

廬山謠寄盧侍御虛舟

我本楚狂人鳳歌笑孔丘手持綠玉杖朝別黃鶴樓五
嶽尋仙不辭遠一生好入名山遊廬山秀出南斗傍屏
風九疊雲錦張影落明湖青黛光金闕前開二峰長銀
河倒挂三石梁香爐瀑布遙相望迴崖沓嶂凌蒼蒼翠
影紅霞映朝日鳥飛不到吳天長登高壯觀天地間大
江茫茫去不還黃雲萬里動風色白波九道流雪山好
為廬山謠興因廬山發閒窺石鏡清我心謝公行處蒼
苔沒早服還丹無世情琴心三疊道初成遙見仙人綵

雲裏手把芙蓉朝玉京先期汗漫九垓上願接盧敖遊
太清

早秋單父南樓酬竇公衡

白露見日滅紅顏隨霜凋別君若俯仰春芳辭秋條泰
山嵯峨夏雲在疑是白波漲東海散為飛雨川上來遙
帷却卷清浮埃知君獨坐青軒下此時結念同懷者我
閉南樓著道書幽簾清寂若仙居曾無好事來相訪賴
爾高文一起予

夢遊天姥吟留別東魯諸公

海客談瀛洲煙濤微茫信難求越人語天姥雲霓明滅
或可覩天姥連天向天橫勢拔五嶽掩赤城天台四萬
八千丈對此欲倒東南傾我欲因之夢吳越一夜飛度
鏡湖月湖月照我影送我至剡溪謝公宿處今尚在淥
水蕩漾清猿啼脚著謝公屐身登青雲梯半壁見海日
空中聞天雞千巖萬轉路不定迷花倚石忽已暝熊咆
龍吟殷巖泉慄深林兮驚層巔雲青青兮欲雨水澹澹

兮生煙列缺霹靂丘壑崩摧洞天石扉訇然中開青冥
浩蕩不見底日月照耀金銀臺霓為衣兮風為馬雲之
君兮紛紛而來下虎鼓瑟兮鸞回車仙之人兮列如麻
忽魂悸以魄動恍驚起而長嗟惟覺時之枕席失向來
之煙霞世間行樂亦如此古來萬事東流水別君去兮
何時還且放白鹿青巖間須行即騎訪名山安能摧眉
折腰事權貴使我不得開心顏

單父東樓秋夜送族弟沈之秦

爾從咸陽來問我何勞苦沐猴而冠不足言身騎土牛
滯東魯沈弟欲行凝弟留孤飛一雁秦雲秋坐來黃葉
落四五北斗已挂西城樓絃桐感人絃亦絕滿堂送君
皆惜別卷簾見月清興來疑是山陰夜中雪明日斗酒
別惆悵清路塵遙望長安日不見長安人長安宮闕九
天上此地曾經為近臣一朝復一朝髮白心不改屈原
憔悴滯江潭亭伯流離放遼海折翮翻飛隨轉蓬聞弦
虛墜下霜空聖朝久棄青雲士他日誰憐張長公

送祝八之江東賦得浣紗石

西施越谿女明艷光雲海未入吳王宮殿時浣紗古石
今猶在桃李新開映古查菖蒲猶短出平沙昔時紅粉
照流水今日青苔覆落花君去西秦適東越碧山清江
幾超忽若到天涯思故人浣紗石上窺明月

下途歸石門舊居

吳山高越水清握手無言傷別情將欲辭君挂帆去離
魂不散煙郊樹此心鬱悵誰能論有愧叨承國士恩雲

物共傾三月酒歲時同錢五侯門羨君素書常滿案含
丹照白霞色爛余嘗學道窮冥筌夢中徃徃遊仙山何
當脫屣謝時去壺中別有日月天俛仰人間易凋朽鍾
峰五雲在軒牖惜別愁窺玉女窗歸來笑把洪崖手隱
居寺隱居山陶公鍊液栖其間靈神閉氣昔登攀恬然
但覺心緒閒數人不知幾甲子昨夜猶帶冰霜顏我離
雖則歲物改如今了然識所在別君莫道不盡歡懸知
樂客遙相待石門流水徧桃花我亦曾到秦人家不知

何處得雞豕就中仍見繁桑麻
翛然遠與世事間裝鸞
駕鶴又復遠何必相從七貴遊
勞生徒聚萬金產揖君
去長相思雲遊雨散從此辭
欲知悵別心易苦向暮春
風楊柳絲

同族弟金城尉叔卿燭照山水壁畫歌

高堂粉壁圖蓬瀛燭前一見滄洲清
洪波洶湧山崢嶸
皎若丹丘隔海望赤城光中乍喜嵐氣滅
謂逢山陰晴
後雪迴谿碧流寂無喧又如秦人月下窺
花源了然不

覺清心魂祇將疊嶂鳴秋猿與君對此歡未歇放歌行
吟達明發却顧海客揚雲帆便欲因之向溟渤

觀博平王志安少府山水粉壁

粉壁為空天丹青壯江海遊雲不知歸日見白鷗在博
平真人王志安沈吟至此願挂冠松谿石磴帶秋色愁
客思歸坐曉寒

對酒

蒲萄酒金叵羅吳姬十五細馬馱青黛畫眉紅錦靴道

字不正嬌唱歌玳瑁筵中懷裏醉芙蓉帳底奈君何

代美人愁鏡

美人贈此盤龍之寶鏡
燭我金縷之羅衣
時將紅袖拂明月
為惜普照之餘輝
影中金鵲飛不滅
臺下青鸞思獨絕
藁砧一別若箭弦
去有日來無年
狂風吹却妾心斷
玉筯并墮菱花前

三五七言

秋風清秋月明落葉聚還散
寒鴉棲復驚相思相見知

何日此時此夜難為情

自溧水道哭王炎

王公希代寶棄世一何早
弔死不及哀殯宮已秋草
悲來欲脫劍挂向何枝
好哭向茅山雖未摧一生淚盡丹陽道

宮中行樂詞六首

小小生金屋盈盈在紫微
山花插寶髻石竹繡羅衣
每出深宮裏常隨步輦歸
只愁歌舞散化作綵雲飛

柳色黃金嫩
梨花白雪香
玉樓巢翡翠
珠殿鎖鴛鴦
選妓隨雕輦
徵歌出洞房
宮中誰第一
飛燕在昭陽

盧橘為秦樹
蒲萄出漢宮
煙花疑落日
絲管醉春風
笛奏龍吟水
簫鳴鳳下空
君王多樂事
何必向回中

繡戶香風暖
紗窗曙色新
宮花爭笑日
池草暗生春
綠樹聞歌鳥
青樓見舞人
昭陽桃李月
羅綺自相親

寒雪梅中盡
春風柳上歸
宮鶯嬌欲醉
簷燕語還飛
遲日明歌席
新花豔舞衣
晚來移綵仗
行樂泥光輝

水綠南薰殿花紅北闕樓鶯歌聞太液鳳吹繞瀛洲素
女鳴珠珮天人弄綵毬今朝風日好宜入未央遊

塞下曲二首

五月天山雪無花祇有寒笛中聞折柳春色未曾看曉
戰隨金鼓宵眠抱玉鞍願將腰下劍直為斬樓蘭

塞虜乘秋下天兵出漢家將軍分虎竹戰士卧龍沙邊
月隨弓影胡霜拂劍花玉關殊未入少婦莫長嗟

秋思

關氏黃葉落妾望自登臺月出碧雲斷單于秋色來胡
兵沙塞合漢使玉關回征客無歸日空悲蕙草摧

侍從遊宿溫泉宮作

羽林十二將羅列應星文霜仗懸秋月霓旌卷夜雲嚴
更千戶肅清樂九天聞日出瞻佳氣葱葱繞聖君

贈孟浩然

吾愛孟夫子風流天下聞紅顏棄軒冕白首卧松雲醉
月頻中聖迷花不事君高山安可仰徒此揖清芬

贈薛校書

我有吳趨曲無人知此音姑蘇成蔓草麋鹿空悲吟未
誇觀濤作空鬱釣鼇心舉手謝東海虛行歸故林

口號贈楊徵君鴻

陶令辭彭澤梁鴻入會稽我尋高士傳君與古人齊雲
卧留丹壑天書降紫泥不知楊伯起早晚向關西

贈崔秋浦二首

崔令學陶令北窗常晝眠抱琴時弄月取意任無絃見

客但傾酒為官不愛錢東臯春事起種黍早歸田
河陽花作縣秋浦玉為人地逐名賢好風隨惠化春水
從天漢落山逼畫屏新應念金門客投沙弔楚臣

贈錢徵君少陽

白玉一杯酒綠楊三月時春風餘幾日兩鬢各成絲
東燭惟須飲投竿也未遲如逢渭水獵猶可帝王師

寄淮南友人

紅顏悲舊國青歲歇芳洲不待金門詔空持寶劍遊海

金史卷四十四下
雲迷驛道江月隱鄉樓復作淮南客因逢桂樹留

寄當塗趙少府炎

晚登高樓望木落雙江清寒山饒積翠秀色連州城目
送楚雲盡心悲胡雁聲相思不可見回首故人情

寄王漢陽

南湖秋月白王宰夜相邀錦帳郎官醉羅衣舞女嬌笛
聲喧沔鄂歌曲上雲霄別後空愁我相思一水遙

南陽送客

斗酒勿為薄寸心貴不忘坐惜故人去偏令遊子傷離
顏怨芳草春思結垂楊揮手再三別臨歧空斷腸

送張舍人之江東

張翰江東去正值秋風時天清一雁遠海濶孤帆遲白
日行欲暮滄波杳難期吳洲如見月千里幸相思

送白利從金吾董將軍西征

西羌延國討白起佐軍威劍決浮雲氣弓彎明月輝馬
行邊草綠旗卷曙霜飛抗手凜相顧寒風生鐵衣

送殷淑

白露洲前月天明送客迴青龍山後日早出海雲來流水無情去征帆逐吹開相看不忍別更進手中杯

送友人

青山橫北郭白水遶東城此地一為別孤蓬萬里征浮雲遊子意落日故人情揮手自茲去蕭蕭班馬鳴

送別

斗酒渭城邊壚頭醉不眠梨花千樹雪楊葉萬條煙惜

別傾壺醕臨分贈馬鞭看君頽上去新月到應圓

送友人入蜀

見說蠶叢路崎嶇不易行山從人面起雲傍馬頭生芳
樹籠秦棧春流遶蜀城升沈應已定不必訪君平

送麴十少府

試發清秋興因為吳會吟碧雲斂海色流水折江心我
有延陵劍君無陸賈金艱難此為別惆悵一何深

江夏送張丞

欲別心不忍臨行情更親
酒傾無限月客醉幾重春
藉草依流水攀花贈遠人
送君從此去迴首泣迷津

廣陵贈別

玉瓶沽美酒數里送君還
繫馬垂楊下銜杯大道間
天邊看綠水海上見青山
興罷各分袂何須醉別顏

別儲邕之剡中

借問剡中道東南指越鄉
舟從廣陵去水入會稽長
竹色谿下綠荷花鏡裏香
辭君向天姥拂石卧秋霜

留別龔處士

龔子棲閒地都無人世喧
柳深陶令宅竹暗辟疆園
我去黃牛峽遙愁白帝猿
贈君卷施草心斷竟何言

渡荆門送別

渡遠荆門外來從楚國遊
山隨平野盡江入大荒流
月下飛天鏡雲生結海樓
仍憐故鄉水萬里送行舟

夜別張五

吾多張公子別酌酣高堂
聽歌舞銀燭把酒輕羅裳
橫

笛弄秋水琵琶彈陌桑龍泉解錦帶為爾傾千觴

見京兆韋參軍量移東陽

聞說金華渡東連五百灘全勝若耶好莫道此行難猿
嘯千谿合松風五月寒他年一攜手搖艇入新安

秋夜與劉碭山泛燕喜亭池

明宰試舟楫張燈宴華池文招梁苑客歌動郢中兒月
色望不盡空天交相宜令人欲泛海只待長風吹

流夜郎至江夏陪長史叔及薛明府宴興德寺

南閣

紺殿橫江上青山落鏡中
岼迴沙不盡日映水成空
天樂流香閣蓮舟颺晚風
恭陪竹林宴留醉與陶公

登新平樓

去國登茲樓懷歸傷暮秋
天長落日遠水淨寒波流
秦雲起嶺樹胡雁飛沙洲
蒼蒼幾萬里目極令人愁

與夏十二登岳陽樓

樓觀岳陽盡川向洞庭開
雁引愁心去山銜好月來
雲

間連下榻天上接行杯醉後涼風起吹人舞袖迴

與賈至舍人于龍興寺剪落梧桐枝望澗湖

剪落青梧枝澗湖坐可窺雨洗秋山淨林光澹碧滋水
閑明鏡轉雲繞畫屏移千古風流事名賢共此時

秋登宣城謝朓北樓

江城如畫裏山晚望晴空兩水夾明鏡雙橋落彩虹人
煙寒橘柚秋色老梧桐誰念北樓上臨風懷謝公

過崔八丈水亭

高閣橫秀氣清幽併在君簷飛宛谿水窗落敬亭雲猿
嘯風中斷漁歌月裏聞閒隨白鷗去沙上自為羣

太原早秋

歲落衆芳歇時當大火流霜威出塞早雲色渡河秋夢
遶邊城月心飛故國樓思歸若汾水無日不悠悠

謁老君廟

先君懷聖德靈廟肅神心草合人蹤斷塵濃鳥跡深流
沙丹竈滅關路紫煙沈獨傷千載後空餘松柏林

謝公亭

謝亭離別處風景每生愁
客散青天月山空碧水流
池花春映日窗竹夜鳴秋
今古一相接長歌懷舊遊

夜泊牛渚懷古

牛渚西江夜青天無片雲
登舟望秋月空憶謝將軍
余亦能高詠斯人不可聞
明朝挂帆席楓葉落紛紛

尋雍尊師隱居

羣峭碧摩天逍遙不記年
撥雲尋古道倚樹聽流泉
花

煖青牛卧松高白鶴眠語來江色暮獨自下寒煙

訪戴天山道士不遇

犬吠水聲中桃花帶露濃樹深時見鹿谿午不聞鐘野竹分青靄飛泉挂碧峰無人知所去愁倚兩三松

聽蜀僧濬彈琴

蜀僧抱綠綺西下峨眉峰為我一揮手如聽萬壑松客心洗流水餘響入霜鐘不覺碧山暮秋雲暗幾重

見野草中有名白頭翁者

醉入田家去行歌荒野中如何青草裏亦有白頭翁折
取對明鏡宛將衰鬢同微芳似相誚留恨向東風

觀獵

太守耀清威乘閒弄晚暉江沙橫獵騎山火遶行圍箭
逐雲鴻落鷹隨月兔飛不知白日暮歡賞夜方歸

宣城哭蔣徵君華

敬亭埋玉樹知是蔣徵君安得相如草空餘封禪文池
臺空有月詞賦舊凌雲獨挂延陵劍千秋在古墳

送賀監歸四明應制

久辭榮祿遂初衣，曾向長生說息機。
真訣自從茅氏得，恩波應阻洞庭歸。
瑤臺含霧星辰滿，仙嶠浮空島嶼微。
借問欲棲珠樹鶴，何年却向帝城飛。

寄崔侍御

宛谿霜夜聽猿愁，去國長為不繫舟。
獨憐一雁飛南海，却羨雙谿向北流。
高人屢解陳蕃榻，過客難登謝朓樓。
此處別離同落葉，朝朝分散敬亭秋。

別中都明府兄

吾兄詩酒繼陶君試宰中都天下聞東樓喜奉連枝會
南陌愁為落葉分城隅綠水明秋日海上青山隔暮雲
取醉不辭留夜月雁行中斷惜離羣

登鳳凰臺

鳳凰臺上鳳凰遊鳳去臺空江自流吳宮花草埋幽徑
晉代衣冠成古丘三山半落青天外二水中分白鷺洲
總為浮雲能蔽日長安不見使人愁

題東谿公幽居

杜陵賢人清且廉東谿卜築歲將淹宅近青山同謝朓
門垂碧柳似陶潛好鳥迎春歌後院飛花送酒舞前筵
客到但知留一醉盤中祇有水晶鹽

中丞宋公以吳兵三千赴河南軍次潯陽脫余
之囚參謀幕府因贈之

獨坐清天下專征出海隅九江皆渡虎三郡盡還珠組
練明秋浦樓船入郢都風高初選將月滿欲平胡殺氣

橫千里軍聲動九區白猿慙劍術黃石借兵符戎虜行
當剪鯨鯢立可誅自憐非劇孟何以佐良圖

春日歸山寄孟六浩然

朱紱遺塵境青山謁梵筵金繩開覺路寶筏渡迷川嶺
樹攢飛拱巖花覆谷泉塔形標海月樓勢出江煙香氣
三天下鐘聲萬壑連荷秋珠已滿松密蓋初圓鳥聚疑
聞法龍叅若護禪愧非流水韻叨入伯牙絃

送友人尋越中山水

聞道稽山去偏宜謝客才千巖泉灑落萬壑樹縈迴東
海橫秦望西陵繞越臺湖清霜鏡曉濤白雪山來八月
枚乘筆三吳張翰杯此中多逸興早晚向天台

送紀秀才遊越

海水不滿眼觀濤難稱心即知蓬萊石却是巨鼇簪送
爾遊華頂令予發舄吟仙人居射的道士住山陰禹穴
尋谿入雲門隔嶺深綠蘿秋月夜相憶在鳴琴

送儲邕之武昌

黃鶴高樓月長江萬里情春風三十度空憶武昌城送
爾難為別銜杯惜未傾湖連張樂地山逐泛舟行諾謂
楚人重詩傳謝朓清滄浪吾有曲寄入棹歌聲

秋日登揚州西靈塔

寶塔凌蒼蒼登攀覽四荒頂高元氣合標出海雲長萬
象分空界三天接畫梁水搖金刹影日動火珠光鳥拂
瓊簾度霞連繡栱張目隨征路斷心逐去帆揚露浴梧
楸白霜催橘柚黃玉毫如可見于此照迷方

秋日與張少府楚城韋公藏書高齋作

日下空庭暮城荒古跡餘地形連海盡天影落江虛舊
賞人雖隔新知樂未踈彩雲思作賦丹壁間藏書查擁
隨流葉萍開出水魚夕來秋興滿回首意何如

過四皓墓

我行至商洛幽獨訪神仙園綺復安在雲蘿尚宛然荒
涼千古跡蕪沒四墳連伊昔鍊金鼎何年閉玉泉隴寒
惟有月松古漸無煙木魅風號去山精雨嘯旋紫芝高

詠罷青史舊名傳今日併如此哀哉信可憐

月夜金陵懷古

蒼蒼金陵月空懸帝王州天文列宿在霸業大江流
淥水絕馳道青松摧古丘臺傾鴟鵂觀宮沒鳳凰樓別殿
悲清暑芳園罷樂遊一聞歌玉樹蕭瑟後庭秋

王昭君

昭君拂玉鞍上馬啼紅頰今日漢宮人明朝胡地妾

相逢行

相逢紅塵內高揖黃金鞭萬戶垂楊裏君家阿那邊

玉階怨

玉階生白露夜久侵羅襪却下水晶簾玲瓏望秋月

襄陽曲四首

襄陽行樂處歌舞白銅鞮江城回渌水花月使人迷
山公醉酒時酩酊襄陽下頭上白接羅倒着還騎馬
峴山臨漢江水綠沙如雪上有墮淚碑青苔久磨滅
且醉習家池莫看墮淚碑山公欲上馬笑殺襄陽兒

洛陽陌

白玉誰家郎迴車度天津看花東陌上驚動洛陽人

靜夜思

牀前明月光疑是地上霜舉頭望山月低頭思故鄉

淶水曲

淶水明秋日南湖采白蘋荷花嬌欲語愁殺蕩舟人

秋浦歌六首

秋浦錦駝鳥人間天上稀山雞羞淶水不敢照毛衣

兩鬢入秋浦一朝颯已衰猿聲催白髮長短盡成絲
秋浦多白猿超騰若飛雪牽引條上兒飲弄水中月
秋浦千重嶺水車嶺最奇天傾欲墮石水拂寄生枝
秋浦田舍翁采魚水中宿妻子張白鵬結且映深竹
桃枝一步地了了語聲聞閣與山僧別低頭禮白雲

越女詞三首

吳兒多白皙好為蕩舟劇賣眼擲春心折花調行客
耶谿采蓮女見客棹歌迴笑入荷花去佯羞不出來

東陽素足女會稽素舸郎相看月未墮白地斷肝腸

巴女詞

巴水急如箭巴船去若飛十月三千里郎行幾歲歸

對雪獻從兄虞城宰

昨夜梁園雪弟寒兄不知庭前看玉樹腸斷憶連枝

答友人贈烏紗帽

領得烏紗帽全勝白接羅山人不照鏡褙子道相宜

別東林寺僧

東林送客處月出白猿啼笑別廬山遠何煩過虎谿

送陸判官往琵琶峽

水國秋風夜殊非遠別時長安如夢裏何日是歸期

陪侍郎叔遊洞庭

剡却君山好平鋪湘水流巴陵無限酒醉殺洞庭秋

望木瓜山

早起看日出暮看樓烏還客心自酸楚况對木瓜山

魯中都東樓醉起作

昨日東城飲還應倒接羅阿誰扶上馬不省下樓時

清谿半夜聞笛

羌笛梅花引吳谿隴水清寒山秋浦月腸斷玉關情

夏日山中

嬾搖白羽扇裸體青林中脫巾挂石壁露頂灑松風

獨坐敬亭山

衆鳥高飛盡孤雲獨去閒相看兩不厭只有敬亭山

勞勞亭

天下傷心處勞勞送客亭春風知別苦不遣柳條青

田園言懷

賈誼三年謫班超萬里侯何如牽白犢飲水對清流

自遣

對酒不覺暝落花盈我衣醉起步谿月烏還人亦稀

憶東山

不向東山久薔薇幾度花白雲他自散明月落誰家

初出金門尋王侍御不遇詠壁上鸚鵡

落羽辭金殿孤鳴託繡衣能言終見棄還向隴山飛

觀放白鷹

八月邊風高胡鷹白錦毛孤飛一片雪百里見秋毫

白鷺鷥

白鷺下秋水孤飛如墜霜心閒且未去獨立沙洲傍

怨情

美人捲珠簾深坐顰蛾眉但見淚痕濕不知心恨誰

清平調詞三首

雲想衣裳花想容春風拂檻露華濃若非羣玉山頭見
會向瑤臺月下逢

一枝紅豔露凝香雲雨巫山枉斷腸借問漢宮誰得似
可憐飛燕倚新妝

名花傾國兩相歡長得君王帶笑看解釋春風無限恨
沈香亭北倚闌干

少年行

五陵年少金市東銀鞍白馬度春風落花踏盡遊何處

笑入吳姬酒肆中

軍行

騮馬新跨白玉鞍
戰罷沙場月色寒
城頭鐵鼓聲猶震
匣裏金刀血未乾

長門怨

桂殿長愁不記春
黃金四屋起秋塵
夜懸明鏡青天上
獨照長門宮裏人

峨眉山月歌

峨眉山月半輪秋影入平羌
江水流夜發清谿向三峽
思君不見下渝州

客中行

蘭陵美酒鬱金香
玉碗盛來琥珀光
但使主人能醉客
不知何處是他鄉

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

聞王昌齡左遷龍標尉遙有此寄

楊州花落子規啼
聞道龍標過五谿
我寄愁心與明月
隨君直到夜郎西

山中問答

問余何事棲碧山
笑而不答心自閒
桃花流水杳然去
別有天地非人間

黃鶴樓送孟浩然之廣陵

故人西辭黃鶴樓
煙花三月下楊州
孤帆遠影碧空盡

惟見長江天際流

東魯門泛舟

日落沙明天倒開
波搖石動水縈迴
輕舟泛月尋谿轉
疑是山陰雪後來

陪族叔刑部侍郎曄及中書賈舍人至遊洞庭
三首

南湖秋水夜無煙
耐可乘流直上天
且就洞庭賒月色
將船買酒白雲邊

洞庭湖西秋月輝
瀟湘江北早鴻飛
醉客滿船歌白紵
不知霜露入秋衣

帝子瀟湘去不還
空餘秋草洞庭間
淡掃明湖開玉鏡
丹青畫出是君山

望廬山瀑布水

日照香爐生紫煙
遙看瀑布挂長川
飛流直下三千尺
疑是銀河落九天

登廬山五老峰

廬山東南五老峰青天削出金芙蓉九江秀色可攬結
吾將此地巢雲松

望天門山

天門中斷楚江開碧水東流直北迴兩岬青山相對出
孤帆一片日邊來

早發白帝城

朝辭白帝彩雲間千里江陵一日還兩岸猿聲啼不盡
輕舟已過萬重山

蘇臺覽古

舊苑荒臺楊柳新
菱歌清唱不勝春
只今惟有西江月
曾照吳王宮裏人

越中覽古

越中勾踐破吳歸
義士還家盡錦衣
宮女如花滿春殿
只今惟有鷓鴣飛

與史郎中欽聽黃鶴樓上吹笛

一為遷客去長沙
西望長安不見家
黃鶴樓前吹玉笛

江城五月落梅花

春夜洛城聞笛

誰家玉笛暗飛聲散入春風滿洛城
此夜曲中聞折柳何人不起故鄉情

宣城見杜鵑花

蜀國曾聞子規鳥宣城還見杜鵑花
一叫一迴腸一斷三春三月憶三巴

陌上贈美人

駿馬驕行踏落花垂鞭直拂五雲車美人一笑褰珠箔
遙指紅樓是妾家

口號吳王美人半醉


風動荷花水殿香姑蘇臺上宴吳王西施醉舞嬌無力
笑倚東窗白玉牀

南流夜郎寄內

夜郎天外怨離居明月樓中音信疎北雁春歸看欲盡
南來不得豫章書

哭晁卿衡

日本晁卿辭帝都征帆一片繞蓬壺
明月不歸沈碧海
白雲愁色滿蒼梧



石倉歷代詩選卷四十四下